

Bosna i Hercegovina
FEDERACIJA BOSNE I HERCEGOVINE
FEDERALNO TUŽILAŠTVO
FEDERACIJE BOSNE I HERCEGOVINE
SARAJEVO
Broj: A- 463/03
Sarajevo, 15.08.2003. godine

KANTONALNIM TUŽILAŠTVIMA OD 1-10
n/r kantonalnih tužilaca

Dosadašnja praksa primjene novog Zakona o krivičnom postupku Federacije BiH ukazala je na niz dilema i otvorenih pitanja koja izazivaju poteškoće u pravilnoj primjeni ovog Zakona.

Na sjednici Predsjedništva Udruženja tužilaca Federacije BiH, koja je održana 14.08.2003. godine u Sarajevu, istaknut je problem da je u praksi primjećeno da sudovi dostavljaju tužilaštvima i krivične predmete u kojima optužnica nije stupila na pravnu snagu sa zahtjevima da se te optužnice urede u skladu sa novim Zakonom o krivičnom postupku Federacije BiH, zbog čega se postavilo pitanje da li je takva praksa sudova u skladu sa ovim zakonom.

S tim u vezi, dana 15.08.2003. godine, održan je Stručni kolegij Federalnog tužilaštva Federacije BiH na kojem je, povodom razmatranja ove dileme, zauzet stav i utvrđeno slijedeće

MIŠLJENJE

Prema odredbi člana 452. stav 1. Zakona o krivičnom postupku Federacije BiH ("Službene novine FBiH", broj: 35/03) postupci u krivičnim predmetima primljenim u rad kod sudova do dana stupanja na snagu ovog Zakona nastaviti će se po odredbama ovog zakona, osim ako odredbama ovog člana nije drugačije određeno. Iz navedene odredbe proizilazi da će se i postupci u krivičnim predmetima u kojima optužnica nije stupila na pravnu snagu, a koji su u radu kod sudova, nastaviti po odredbama ovog zakona, osim ako tim zakonom nije drugačije određeno.

Odredbom člana 452. stav 4. Zakona o krivičnom postupku Federacije BiH propisano je da će predmete iz nadležnosti Suda BiH primljene u rad kod sudova u Federaciji, odnosno tužilaštava u kojima optužnica nije stupila na pravnu snagu dovršiti ti sudovi po odredbama ovog

zakona, osim ako Sud BiH po službenoj dužnosti ili na obrazložen prijedlog stranaka ili branioca ne odluči da preuzme takav predmet.

Dovodeći istaknuto zakonsko određenje u vezi sa pitanjem kako će sudovi postupati sa predmetima iz svoje stvarne nadležnosti u kojima optužnica nije stupila na snagu, rukovodeći se pravnom analogijom, Stručni kolegij Federalnog tužilaštva smatra da su sudovi u Federaciji dužni da u predmetima iz njihove stvarne nadležnosti u kojima nije optužnica stupila na snagu dovršavaju u skladu sa odredbama novog Zakona o krivičnom postupku te da je pogrešna praksa sudova da takve predmete vraćaju nazad nadležnim tužilaštvima u cilju uređivanja optužnice sa novim Zakonom o krivičnom postupku. To praktično znači da bi se predmeti u kojima optužnica nije stupila na pravnu snagu trebali dostavljati sudiji za predhodno saslušanje, koji će postupiti u skladu sa odredbom člana 243. Zakona o krivičnom postupku Federacije BiH te optužnicu potvrditi ili odbiti sve ili pojedine tačke optužnice u roku od osam dana od dana prijema optužnice.

Stručni kolegij Federalnog tužilaštva ovakav stav obrazlaže posebno opštim zakonskim određenjem da se postupci u krivičnim predmetima koji su primljeni u rad kod sudova do dana stupanja na snagu novog Zakona o krivičnom postupku Federacije BiH nastavljaju po odredbama ovog zakona (član 452. stav 1. ZKP-a FBiH), što uključuje i postupke u krivičnim predmetima u kojima optužnica nije stupila na pravnu snagu. Ovo tim prije, što proizilazi da, ako sudovi u Federaciji mogu dovršavati postupke po odredbama ovog zakona u predmetima iz nadležnosti Suda BiH u kojima optužnica nije stupila na pravnu snagu (čl. 452. stav 4. ZKP-a FBiH), onda su to obavezni učiniti i u pogledu predmeta iz svoje stvarne nadležnosti u kojima optužnica nije stupila na pravnu snagu.

%

Dostavljajući prednji stav Stručnog kolegija Federalnog tužilaštva, Glavni federalni tužilac obavještava Kantonalne tužioce da ovaj stav, u smislu člana 6., 20. i 23. Zakona o Federalnom tužilaštvu Federacije BiH, ima karakter općeg obaveznog uputstva za rad u cilju jedinstvene i pravilne primjene Zakona o krivičnom postupku Federacije BiH.

S poštovanjem,

GLAVNI FEDERALNI TUŽILAC

Zdravko Knežević